

Qaanaami, Illoqqortoormiuni, Tasiilami taakkualu nunaqarfiini nannunik aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqati-giissutaasa pisussaaffiliinerisa iluani, periarfissaanersoq misissoqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Lars Mathæussen, Siumut)

Akissuteqaat

(Aalisarnermut, Piniarnermut Nunalerinermullu Naalackersuisoq)

Aappassaaneerneqarnera

Siullermik Inatsiartut Aalisarnek, Piniarnek Nunalerinerlu pillugit Ataatsimiititaliaata isumaliutissiissutaa maajip 31-ianeersoq innersuussutigerusuppara, ataatsimiititaliaallu sulilluarsimanerannik, tamatumani nannut, aarrit qilalukkanillu piniarnermut killiliussaasunik Naalackersuisut naliliinissaannik peqquneqarnissaannik inassuteqarnerannut qutsavigerusullugit.

Isumaliutissiisummi ataatsimiititaliap maluginiarpa Inatsisartuni ikannerussuteqartut kissaatigigaat piniarnerup killilersorneqarunnaarnissaanut Kalaallit Nunaata nunanik allanik isumaqatigiissutaasa killigisa iluini, Naalackersuisut sukumiinerusumik misissuissasut. Akuerisassanngorlugu allanguutissamik ataatsimiititaliaq aamma siunnersuuteqarpoq, ” nannut, aarrit, qilalukkat qernertat qaqortallu piniagaaneritut piffissaliussat pillugit aamma piffissaliussat qanoq atorluarnerusinnaanerannut nalilersuinissamik, kiisalu nalunaarutit attuumassutillit najukkami piniartarnermut aallaaniartarnermullu pissutsinut qanoq naleqqussarneqarsinnaanneranik misissuinissamut” Naalackersuisut peqquneqassasut.

Aalisarnermut, Piniarnermut Nunalerinermullu Naalackersuisoqarfik (APNN), uumasunik pineqartuni aqutsinerup naleqqussarneqarnissaanut periarfissanik misissuinermik aallartitsinikuuvoq. Umasoqatigiiaat killigi sumiiffinnilu pissutsit aallaavigalugit, uumasunut pineqartunut nalunaarutit nunanullu allanut pisussaaffiit, ilaatigut pisassiissutinik piniarnermullu piffissaliunneqartunik allanguisinnaaneranut qanoq periarfissiinersut APNN-imit qimerloorneqarpoq. Assersuutigalugu aqutsiveqarfimmi Qaanaami teknikkikkut pisasseeriaaseq misilittagaqarfignersimavarput, uumasuni allani sumiiffinnullu allani aaqqissuusseriaatsit atuuksilerneqarsinnaasut takorloorneqarsinnaasoq.

Pissutsinut atuuttunut nalunaarutit atuuttut qanoq tulluutsiginersut ataavartumik APNN-imit nakkutigineqartuupoq. Pisariaqartillugu nalunaarutit nalimmassarneqartarput siullertulli maleruaqqusat atuutereersut iluini qanoq aqutsinermik nalimmassaasoqarsinnaanersoq qimerloorneqartarluni. Piniarnermut piffissaliunneqarsimasut Naalackersuisunit naliliiffigineqarnissaannut ataatsimiititaliap siunnersuutaa nalunaarutillu atuuttut piniarnermut atungaasunut nalimmassarneqarnissaannut naliliiffigineqarnissaat taamaalillutik APNN-ip ulluinnarni suliaasa ilagereerpaat.

Kalaallit Nunaata nunanut allanut isumaqatigiissutaasa killigisa iluini killilersuinerup atorunnaarsinneqarsinnaanerata sukumiinerusumik Naalackersuisunit misissuiffigineqarnissaannik kissaatigineqartoq eqqarsaatigalugu, isumaqatigiissutit atuuttut pillugit ataatsimiititaliaq APNN-imit ilisimatinneqarumaarpoq, tassani ersarissarneqassalluni isumaqatigiissutinut ataasiakkaanut Kalaallit Nunaata suut pisussaaffiginerai. Ersarissarneqassarli isumaqatigiissutit Kalaallit Nunaata

pituttofigisimasai mianersortumik aqutsinissamik tunngaveqarmata. Tamatuma malitsigaa piniakkanik aqutsinissamut biologit siunnersuinerat Kalaallit Nunaannit malinneqarnissaat. Biologit siunnersuinerata piffimmilu ilisimasat oqimaaqatigiissarneqarnerigisut tunngaviusumik oqariartuut tamanna malitseqartinneqartarpoq.